

Udruženje „Naša Jugoslavija”: Izbori nisu bili demokratski



Dogodiše se, eto, neki novi izbori u BiH. Jesu li bili demokratski? Nisu, i to iz najmanje jednog razloga; u predsjedništvo BiH su ponovo mogli biti birani isključivo pripadnici tri nacionalnosti – Srbi, Hrvati i Bošnjaci! Tu negativnu sliku ne popravlja ni vrlo dobar rezultat „neutralnog“ SDP-a. Romi, Jevreji, Jugoslaveni i mnogi drugi i dalje nemaju pravo biti birani.

Piše: Dalibor Tomić, predsjednik udruženja Naša Jugoslavija

Tu, dakle, ne može biti govora o demokratiji. Hoće li navedena praksa biti promijenjena u mnogome zavisi od političke volje za eventualno provođenje budućih ustavnih promjena. Sud za ljudska prava u Strasbourg-u svojom je odlukom u slučaju „Sejdić i Finci protiv BiH“ nedvosmisleno pokazao da pitanje prava svih naroda u okviru bh-društva nije adekvatno riješeno i da su promjene u tom pravcu nužne i neophodne. Činjenica da se ta odluka suda ne poštuje ni danas pokazuje da unutar Bosne i Hercegovine očigledno postoji otpor.

Članovi Udruženja „Naša Jugoslavija“ i Savez Jugoslavena kao njegov sastavni dio, koji se zajednički bore za priznavanje prava na nacionalnost Jugoslaven, žele vjerovati da će do navedenih promjena, pored svih poteškoća napokon doći.

Izbori su pokazali još jednu bolnu tačku, kojom izvjesni krugovi očigledno još uvijek pokušavaju dostići određene ciljeve, a koji su upereni protiv opstanka BiH kao naše zajedničke države. Rat je odavno završen, ali je mržnja i dalje prisutna noseći sa sobom strah od novih razmirica. Provođenjem psihologije straha direktno se radi na destabilizaciji zemlje, a aktualna situacija se želi prikazati bezizlaznom. O alternativama se ne želi otvarati diskusija već se uporno nameće isključivo jedna mogućnost – razbijanje BiH. Nije li nam dovoljno iskustvo iz vremena razbijanja SFRJ? Očigledno se provodi politika izbjegavanja dijaloga, jer dijalog zahtijeva kompromise, na koje mnogi izvjesno nisu spremni. Istrajava se uporno na istini samo jedne strane, a ne na dogovoru. Intenzitet antagonizama među aktuelnim političkim strankama, čije smanjenje bi zasigurno dovelo do pozitivnih promjena, ne obećava skori popravak.

Iz navedenog se može izvesti žalostan zaključak da velikom broju političkih stranaka u BiH zapravo uopšte nije stalo do jedinstva zemlje. Vođeni egoizmom pokazuju da njihovi interesi leže u borbi za sopstveni profit nauštrb zajednice. Udruženje „Naša Jugoslavija“ apeluje na buđenje svijesti o odgovornosti koju svi zajedno snosimo prema budućim generacijama. Svi oni, koji se i pored svega doživljenog još uvijek opredjeljuju za jednonacionalne stranke biraju put manjeg otpora i svjesno izbjegavaju tešku borbu za izgradnju pravednog društva.

Naše Udruženje kao nevladina organizacija će i dalje pratiti kretanja na društveno-političkoj sceni BiH i boriti se za prava svih, a naročito onih, čija prava još uvijek nisu na željenom nivou. Nacionalne manjine su sastavni dio ovog društva i žele da se bore na jednakim osnovama za prosperitet ove zemlje i ne dozvoljavaju da ih se gura u stranu. Zbog toga pozivamo novoizabrane političare da se napokon okrenu demokratskim principima, koje tako velikodušno prikazuju na svojim predizbornim skupovima i svojim primjerom pokažu da zaista misle onako kako govore. Do sada to nije bio slučaj.